

Obraćanje prvog zamjenika visokog predstavnika povodom 18. godišnjice helikopterske nesreće na Prokoškom jezeru



Poštivanje obaveze prema miru

Okupili smo se danas da odamo počast i sjetimo se dvanaest naših kolega koji su ovdje izgubili život u vršenju ključnih dužnosti u cilju osiguranju trajnog mira u ovoj zemlji.

Činjenica da se jedna kobna nesreća dogodila na ovako lijepom mjestu zasigurno odražava prirodu stvari u ovom svijetu – uzajamno postojanje ružnog i lijepog, mržnje i ljubavi, neuspjeha i uspjeha.

Brutalnost sukoba u Bosni i Hercegovini dogodila se u jednoj od najidiličnijih zemalja na svijetu. A okrutnost i banalnost šovinizma koji je podgrijavao sukob i koji je od tog vremena stalni teret za ovu zemlju izrodili su se iz kulture koja je sofisticirana i saosjećajna.

Činjenica da stojimo ovdje, 18 godina nakon stradanja naših kolega, odražava još jedan suštinski aspekt našega svijeta, a on je da – iako je ponekad za to potrebno vrijeme – stvari koje su izgrađene na pozitivnim, konstruktivnim, širokogrudim principima u konačnici prevagnu.

Bivši poljski predsjednik Lech Walesa mudro je istaknuo da je

skoro nemoguće izgraditi išta ako postoje frustracija, gorčina i osjećaj bespomoćnosti. Isto tako vrijedi i obrnuto: sve je moguće ako postoji povjerenje, darežljivost i odlučnost za uspjeh.

Ovi pozitivni atributi – povjerenje, darežljivost i odlučnost – mogu se ponovo uplesti u tkivo bh. društva. Zato nije nerazumno vjerovati da će pozitivno ovdje prevagnuti, bez obzira na to koje se poteškoće mogu pojaviti kratkoročno i srednjeročno.

Naše kolege su izgubile svoje živote na ovoj planini, ali mi smo ovdje danas, na ovom mjestu i u ovoj zemlji, da nastavimo njihov posao koji nije završen sa završetkom njihovih života i neće biti završen s nama. Nastavit će se jer je utemeljen na snažnim i pozitivnim principima.

Principima inkluzije, pravde, pomirenja i mira.

Ovi principi će nadživjeti pozive na mržnju i inat, na sumnju i tišinu i podjelu.

Dugoročno, istina pobjeđuje laž, ljubav pobjeđuje mržnju. Pobjeđuju pozitivne vrijednosti.

Stojimo ovdje tužni, ali ne očajavamo, jer posao koji su 1997. godine započele naše kolege danas nastavlja veliki broj muškaraca i žena unutar i izvan granica Bosne i Hercegovine koji vjeruju da ovo može biti i da će biti zemlja u kojoj svaki njen građanin ima mogućnost da živi i radi dostojanstveno i u miru.

Odajemo počast i sjećamo se Petera Backesa, Livia Beccaccioa, Andrzeja Bulera, Davida Kriskovicha, Leah Melnick, Charlesa Morpetha, Williama Nesbitta, Marvina Padgetta, Thomasa Reinhardta, Jurgena Schaufa, Georga Stieblera i Gerda Wagnera.

Odajemo im počast nastavljući njihov posao, a s ovog mjeseta odlazimo s novim opredjeljenjem da nastavimo raditi.